

Segun coordinadora tin 259 yamada registra

Tienda Di Educacion ta yuda mayornan cu guia pa lanta nan yiu

ORANJESTAD - Den temporada cu scol ta cabando mayornan por wordo confronta cu situacion nobo Tienda Di Educacion (TDE) ta disponibel for di 8or di mainta pa 9or di anochi pa yuda cu esaki. Sra. Corina Linssen coordinador di TDE a muestra Bon Dia Aruba e situacionnan cu ta presenta.

Sra. Linssen a bisa cu desde di oktober 2013 e fundacion ta den servicio y a ricibi un total di 259 yamada cu tin 154 mama, 25 tata y 80 otro sea wela, welo, juffrouw, maestro, lider di creche, of lider di traimerdia.

Topico mas yama

Preguntanan tocante e manera di lanta un yiu por ehempel con mi por structura un dia, con mi por pone regla, con mi por comunica cu mi yiu, con mi por pone consecucionnan, preguntanan tocante educacion sexual, preguntanan tocante con nan por deal cu termento cu ta pasa cu nan yiu, preguntanan tocante con nan por guia nan yiu den un divorcio y preguntanan tocante uza/experimenta cu droga/alcohol.

“Nos ta ripara cu tin hopi mayor cu ta yama nos cu kier combersa cu un profesional,



nan ta sinti alivio na momento nan por papia over nan preocupacion y nan ta wordo scucha, wordo tuma na serio”, segun sra. Linssen. Nos ta ripara nan ta contento cu nos ta busca hunto cu nan pa un solucion adecuado, duna nan atencion y tempo sra. Linssen a bisa.

Por yama bek

E sosten cu e fundacion ta duna e mayornan ta aprecia esaki hopi. Varios biaha mayor ta yama bek pa laga sa con e situacion ta bayendo of papia un biaha mas tocante e solucion. “Si mayor kier nos tambe por yama nan bek solamente si nan kier duna nos

nan number di telefon”, sra. Linssen a bisa. E yamadanan cu nos ta haya mas hopi ta mayornan cu tin “teenagers”, sra. Linssen a agrega.

Tienda di Educacion tey pa mayornan/educadornan, pa duna sosten y consejo den criansa di nan yiunan. Awor Aruba tambe tin Telefon pa Mayor (161).

Esaki ta encera cu mayor/educador por yama 161 pa papia cu un profesional tocante criansa di nan yiu entre e edad di 0 pa 18 aña sra. Linssen Despues di vakantie di lo duna un curso nobo cu e topico: Con bo por guia bo yiu teenager. Mirando e necesidad door di e cantidad di yamadanan cu e fundacion ta ricibi

“Nos sa no ta tur ora e ta facil pa lanta un mucha, e ta algo cu mayor ta haci tur dia y e ta hopi special pero tambe e por ta un reto”, sra Linssen a bisa. Pesey Telefon pa Mayor tey pa duna e sosten.

Awo nos ta den e temporada cu muchanan ta enfrente un cambio grandi den nan bida, e muchanan ta cabando un otro aña escolar. Tin mucha cu ta haya esaki hopi emocionante y nan no por warda pa bay e klas nobo of e scol nobo. Tin mucha cu tin mas dificultad cu esaki. Nan ta un poco ansioso pa e cambio. Nan no kier bay e klas nobo of no kier bay e scol nobo. Nan por tin miedo nan manera, mi no kier perde mi amiga/amigo y cu nan ta sinti cu nan no

lo conoce ningun hende. E miedo nan aki ta hopi normal, como mayor bo por yuda bo yiu deal cu e situacion riba diferente manera.

Mustra comprension

Bisa bo yiu cu esaki por ta un tempo cu e ta experiancia hopi tension. Cambionan grandi den bida sa duna tension. Splica cu e transicion di bay otro klas of scol ta parti di bida.

Sostene bo yiu bisando e yiu cu bo ta kere den dje y cu bo sa cu e por. Tambe por bisa cu maske e ta bay otro klas of scol cu e semper por keda den contacto cu su amiga of amigonan y cu ademas e lo haya amistadnan nobo.

Hunto por pensa riba algo leuk pa haci por ehempel un ritual pa su mes, un pidjama party of traha un buki di recuerdo cu potret etc. pa conmemora y conclui e parti ey di nan bida riba un manera leuk y positivo.

Planea momentonan social

Yuda bo yiu planea momentonan social hunto cu su amigonan por ehempel pone dianan fiho cu nan lo topa otro na un luga di nan escogencia. Esaki por ta na un cas, cine, skype of un luga cu semper nan a bay hunto. Esaki lo yuda bo yiu pasobra e ta wak cu su amistadnan no mester stop.

Lo yuda bo yiu cu su miedo of inseguridad nan si hunto boso bay e scol of e klas nobo. Asina nan por wak unda e ta y nan lo sinti mas comodo cu e idea di bay eynan.

Finalmente e ta leuk pa bay busca e cosnan nobo cu bo yiu lo mester pa e aña escolar nobo. Hunto pensa kico lo por haci pa personifica e cosnan door di por ehempel pinta riba su schriften of e kaft di e bukinan.

“Nos ta aprecia cu mayornan tin confianza den nos y nos ta spera cu nos por keda duna nan consejo y sosten ora nan mester di dje” sra. Linssen a bisa cu gusto. □

